



جمعيت العلماء ومدرسي الاسلام في سنغافورة

Persatuan Ulama dan Guru-Guru Agama Islam (Singapura)
Singapore Islamic Scholars & Religious Teachers Association

KENYATAAN MEDIA

3 Februari 2020

RESPON PERGAS MENGENAI PENULARAN WABAK KORONAVIRUS WUHAN DI SINGAPURA

Merujuk kepada berita mengenai penularan wabak Koronavirus Wuhan di Singapura, Pergas turut sama prihatin di atas situasi yang telah melanda negara kita kini.

2 Dengan ini, Pergas juga turut menyokong panduan agama yang telah dikeluarkan oleh pihak Majlis Ugama Islam Singapura (Muis) pada 30 Januari 2020, serta menyeru kepada sekalian masyarakat Islam Singapura untuk berwaspada dan mengambil langkah-langkah yang telah dinasihati pihak Kementerian Kesihatan Singapura (MOH) seperti yang dinyatakan dalam kenyataan mereka pada 25 Januari 2020 yang lalu bagi mengawal penularan wabak ini.

3 Bertepatan dengan seruan agama juga, masyarakat Islam digesa untuk mengambil langkah berjaga-jaga dalam memastikan persekitaran yang bersih dan sentiasa memantau kesihatan tubuh badan. Setiap individu juga dinasihatkan untuk segera mendapatkan rawatan kesihatan jika terdapat sebarang simptom-simptom yang boleh memudaratkan keadaan, selain mengambil langkah-langkah yang telah disarankan oleh MOH semasa mendapatkan rawatan seperti mengenakan pelitup semasa berada di tempat awam.

4 Selain mengamalkan langkah-langkah pencegahan, Pergas juga ingin menganjurkan masyarakat Islam untuk sentiasa mengingati Allah dan sentiasa berdoa memohon bantuan-Nya di masa-masa kesulitan ini seperti yang telah diajarkan Rasulullah s.a.w.

Daripada Khawlah binti Hakim r.a.: Rasulullah s.a.w. bersabda: “Siapa yang datang ke satu tempat, lalu mengucapkan:

أَعُوذُ بِكَلِمَاتِ اللَّهِ التَّامَّاتِ مِنْ شَرِّ مَا خَلَقَ

“Aku berlindung dengan kalimat-kalimat Allah yang Maha Sempurna daripada kejahatan makhluknya.”

Maka dia tidak akan disakiti oleh sesuatu apapun di tempat tersebut hingga ia beredar daripadanya.” (Muslim)

5 Pada masa yang sama, Pergas juga ingin menggesa masyarakat Islam untuk sentiasa memastikan kesahihan sebarang berita dan tidak menyebarkan sebarang andaian yang tidak pasti bagi mengelak dari terjadinya sebarang kekeliruan di kalangan anggota masyarakat.

6 Pergas juga ingin menyeru masyarakat Islam khususnya untuk meningkatkan kesabaran dalam masa-masa kesulitan ini dan tidak melakukan sesuatu yang boleh mengeruhkan lagi keadaan seperti mengaitkan sebarang kejadian malang yang berlaku adalah disebabkan perilaku mana-mana pihak, tidak kira sama ada sesama saudara seislam atau seinsan. Sebaiknya mohonlah perlindungan daripada Allah s.w.t. kerana Dialah sebaik-baik perlindungan. Ini bersesuaian dengan sabda Rasulullah s.a.w. yang bermaksud:

“Dan sesungguhnya Allah akan sentiasa menolong seseorang hamba-Nya, selagi mana hambanya sentiasa menolong saudaranya”. (Muslim)

7 Semoga masyarakat Islam di sini terhindar daripada jangkitan ini dan dilindungi Allah s.w.t. di dalam apa jua keadaan.

PERSATUAN ULAMA DAN GURU-GURU AGAMA ISLAM (SINGAPURA)